



Broj: 02-04-1744/21-AP-3
Datum: 27.07.2021. godine

OPĆINSKO VIJEĆE ZAVIDOVIĆI
n/r PREDSEDavajućoj Općinskog Vijeća
gospođa Erna Merdić Smailhodžić

PREDMET: Odgovori na vijećnička pitanja sa 6. sjednice Općinskog
vijeća Zavidovići održane 30.06.2021. godine, dostavljaju se

Povodom vijećničkih pitanja postavljenih na 6. sjednice Općinskog vijeća Zavidovići održanoj 30.06.2021. godine, dostavljamo odgovore na iste kako slijedi:

1. VIJEĆNIČKO PITANJE VIJEĆNIKA HARISA HODŽIĆ

Vijećnik Haris Hodžić: Na osnovu članova 8. i 87. Poslovnika o radu Općinskog vijeća Zavidovići, kao vijećnik Općinskog vijeća Zavidovići postavljam sljedeće vijećničko pitanje: Zašto se zaključak Općinskog vijeća Zavidovići broj 01-31-1346/19-AP-7 od 16.06.2019. godine još uvijek nije sproveo/realizovao?

Obrazloženje:

Mještani naseljenog mjesta Potkleče traže informaciju zašto nadležne općinske službe do danas nisu još uvijek ništa poduzele po pitanju utvrđivanja javnog interesa za nadogradnju i dogradnju nekategorisanog puta u dijelu naselja Ukevače obzirom da je Općinsko vijeće Zavidovići još u 2019. godini usvojilo zaključak kojim se prihvata inicijativa za utvrđivanje javnog interesa, i dobijanja svih neophodnih dozvola na ime ove putne komunikacije.

Direktno pitanje:

Tražimo od nadležne općinske službe da nam dostavi informaciju zašto se usvojena inicijativa iz 2019. za utvrđivanje javnog interesa imenovane putne komunikacije još uvijek nije realizovala i kada se može očekivati utvrđivanje javnog interesa, završetak investiciono-tehničke dokumentacije, eksproprijacija zemljišta i dobijanje svih neophodnih dozvola za putnu komunikaciju u naseljenom mjestu Ukevača?

Od nadležnih zahtijevam jasne odgovore u pisanoj formi.

Vijećničko pitanje upućuje se nadležnim općinskim službama.

S poštovanjem,

Odgovor na vijećničko pitanje (Odgovor je sačinila Služba za upravu ekonomskih poslova i poduzetništvo): Donošenju odluke o utvrđivanju javnog interesa prethodi izrada investiciono-tehničke dokumentacije, te pribavljanje urbanističke saglasnosti. Zbog poremećaja

uzrokovanih pandemijom corona virusa, te preusmjeravanju budžetskih sredstava na prevazilaženju iste, Općina Zavidovići nije raspolagala sa dovoljno budžetskih sredstava za pokretanje postupka izrade investiciono-tehničke dokumentacije.

Također, Općina Zavidovići nije raspolagala sa dovoljno sredstava za rješavanje imovinskopravnih odnosa, kako bi se moglo pribaviti odobrenje za građenje.

U narednom periodu, a u skladu sa raspoloživim budžetskim sredstvima i prioritetima Općina Zavidovići će nastojati realizovati predmetni Zaključak.

Odgovor na vijećničko pitanje (Odgovor je sačinjen na osnovu akta Općinskog pravobranilaštva Zavidovići broj: R.49/21 od 30.07.2021. godine): Provjerom kroz upisnik U. Općinskog pravobranilaštva utvrđeno je da do danas Općinskom pravobranilaštvu nije podnesena Inicijativa za rješavanje imovinskopravnih odnosa u svrhu nadogradnje i dogradnje nekategorisanog puta u dijelu naselja „Ukevače“ , u MZ „Potkleče“.

Nadležna Služba za upravu ekonomskih poslova i poduzetništvo nije još pristupila izradi projektne dokumentacije, niti je podnesen Zahtjev za dobijanje Urbanističke saglasnosti, kao akta koji se sa glavnim projektom dostavlja uz Inicijativu za rješavanje imovinskopravnih odnosa Općinskom pravobranilaštvu, jer u periodu iza nas sredstva za ove namijene su, iz objektivnih razloga, preusmjerena u svrhu prevazilaženja poremećaja uzrokovanih pandemijom.

Osim toga iz istih razloga ne postoje dostatna sredstva ni na Transferu „Troškovi eksproprijacije“, a koja moraju biti operativna na posebnom podračunu za eksproprijaciju koji se vodi pri Union banci da bi se Prijedlog za javni interes uopće uputio prema Općinskom vjeću Općine Zavidovići.

Ukoliko i kada Općinskom pravobranilaštvu Inicijativa za rješavanje imovinskopravnih odnosa u svrhu nadogradnje i dogradnje nekategorisanog puta u dijelu naselja „Ukevače“ u MZ „Potkleče“ bude podnesena, te i sredstva na Transferu „Troškovi eksproprijacije“ odnosno na podračunu pri Union banci budu operativna, Prijedlog za utvrđivanje javnog interesa će biti dostavljen u nadležno postupanje Općinskog vjeća Općine Zavidovići.

2. VIJEĆNIČKO PITANJE VIJEĆNIKA RASIMA MUJKIĆ

Vijećnik Rasim Mujkić: Selamim i pozdravljam sve prisutne, medije i naše gledaoce, hoću reć slušaoce. Ovako htio sam da podnesem Inicijativu vezanu za ovaj put o kome je bilo govora u prethodnim sjednicama. Vezano za taj put, ulaz Dom Mećeveći. Podnosim Inicijativu da se uradi projekat, dokumentacija, pošto 12 godina već stoji u ladicama taj neki Idejni projekat. Znači, da se to odradi. Takođe, želio bi da ubrzam sa realizacijom puta Krčevine - Dom Mećeveći, jer sredstva imaju na računu i načelnik je to obećo. Samo bi želio da to ubrzam. Toliko.

Odgovor na vijećničko pitanje (Odgovor je sačinila Služba za upravu ekonomskih poslova i poduzetništvo): Općina Zavidovići posjeduje glavni projekat lokalne cesta Ulaz Mećeveći – Pašin Konak. Za fazu ceste Ulaz Mećeveći – Krčevine nije izdato odobrenje za građenje zbog neriješenih imovinskopravnih odnosa.

Također, Planom kapitalnih investicija Općine Zavidovići revidiran za period 2021. – 2025. godine definisan je projekat Investiciono održavanje i sanacija dijela lokalne ceste Zavidovići – Pašin Konak u iznosu od 120.000,00 KM, a Planom javnih nabavke Općine Zavidovići za 2021. godinu opredjeljena su sredstva u iznosu od 50.000,00 KM za Nabavku radova investicionog održavanja i sanacija dijela lokalne ceste Zavidovići-Pašin Konak na dionici Hajderovići-Imamovići.

3. VIJEĆNIČKO PITANJE VIJEĆNIKA AJDINA POLIĆ

Vijećnik Ajdin Polić: Imam dopunsko pitanje. Poštovano Radno predsjedništvo, poštovane kolege vijećnici, kolegice vijećnice, sve vas srdačno pozdravljam. Imam tri pitanja. Sa prvim pitanjem nisam zadovoljan, odnosno postavljam dopunsko pitanje: dal može služba da uputi dopis Telemahu, da traži informaciju o izvedenim radovima, o nadzornom organu, te po mogućnosti da se dostavi odobrenje o izvođenju radova ili Ugovor da imamo uvid u uslove izvođenja radova i uvid u obavezu saniranja nastale štete. Radi se o putu odnosno o nastalim štetama na putu od Sinanovića do Mahoja nakon prokopavanja, odnosno polaganja optičke trase za Telemah. Priložen je ovdje i odgovor akta službe, odnosno inspektora građevinskog inspektora i to je uredu, al ovo se radi direktno da dobijemo informaciju od Telemaha. Hvala.

Odgovor na vijećničko pitanje (Odgovor je sačinjen na osnovu akta Službe za upravu ekonomskih poslova i poduzetništvo, broj: 03-45-17-213/21 od 21.07.2021. godine): Služba za upravu ekonomskih poslova i poduzetništva je u skladu sa postavljenim dopunskim pitanjem vijećnika Ajdina Polića na 6. sjednici Općinskog vijeća Zavidovići koja je održana 30.06.2021. godine uputila dopis na adresu sjedišta kompanije Telemach, ulica „Džemala Bijedića“ broj 216 u Sarajevu. Također, provjerom podataka iz nadležnosti Službe za upravu geodetskih, imovinskopravnih poslova i urbanizma utvrđeno je da nije izdata urbanistička saglasnost za navedene radove, a dopisom se tražilo i očitovanje po istom. Inspektor za ceste je uposlen 01.07.2021. godine i preuzeo je poslove iz svoje nadležnosti, a inspeksijski pregled će izvršiti nakon dostave izjašnjenja navedene kompanije, obzirom da će isto biti uzeto u razmatranje prilikom pregleda. O izjašnjenju Telemach-a i ishodu inspeksijskog pregleda, pripremit će se odgovor koji će biti dostavljen na uvid.

4. VIJEĆNIČKO PITANJE VIJEĆNICE ERNE MERDIĆ SMAILHODŽIĆ

Vijećnica Erna Merdić Smailhodžić: Djelimično zadovoljna. Imam dopunsko pitanje. Što se tiče mog pitanja vezano je za Centovu prodavnicu, meni je u odgovoru navedeno da je 21.4. Općina Zavidovići primila obavijest da je kao vlasnik Centrove prodavnice dužna poduzeti mjere u skladu sa mišljenjem koji je dao inspektor gospođa Alma Omeragić. Međutim, nije mi odgovoreno kada se planira realizovati budući da je prošlo više od 2 mjeseca, dakle kako je Općina primila tu obavijest, međutim kada će se realizovati to što je dato mišljenje inspektora?

Odgovor na vijećničko pitanje (Odgovor je sačinjen od strane Stručne službe općinskog načelnika): Za obezbjeđenje prostora i njegovo čišćenje potrebno je utrošiti određena novčana sredstva za angažovanje radne sange, mehanizacije i nabavku potrebnog materijala. U toku su pripreme aktivnosti za nabavku materijala potrebnog da se objekat zaštiti od neovlaštenog ulaženja u isti (željezni profili, armaturna mrežana, najlon, vijci i drugo) uz prethodno čišćenje istog. Prema slobodnoj procjeni za obezbjeđenje navedenog prostora potrebno je angažovanje oko 1.500,00 – 2.000,00 KM iz Budžeta općine Zavidovići.

5. VIJEĆNIČKO PITANJE VIJEĆNIKA ADIJA MAHOVAC

1. Vijećnik Adi Mahovac: Ovako, ja sam postavio pitanje. Bila su dva vijećnička pitanja. Želim odgovor po vijećničkom pitanju koje sam postavio Invalidski odbojkaški klub, gdje smo dobili informaciju da Invalidski Odbojkaški klub iz sredstava dobio 2000, kao Transfer i da nisu nije mi jasno objašnjeno koliko koliko ih sleduje. Tamo smo rekli da se to povećalo na 10%, sa 5 na 10, al to je iz Budžeta koji je bio 2019. 2020. koji je iznosio za sportske klubove 235000. Ove godine je nametnutim Budžetom to je nekih 45.000 mislim i tu se povećalo na 10 % što u konačnosti iznosi smanjenje Budžeta za Invalidski odbojkaški klub i želim direktno

pitanje da se odgovori, koliko taj klub može da očekuje podrške i da bi oni mogli znati da li se uopće mogu takmičiti u Premijer ligi u Bosne i Hercegovine. Hvala.

Odgovor na vijećničko pitanje (Odgovor je sačinjen na osnovu akta Službe za upravu društvenih djelatnosti i opću upravu broj 04-45-14/21-AP-217 od 30.07.2021. godine): Prije svega, važno je napomenuti da ne postoji Transfer za finansiranje redovnih sportskih aktivnosti Odbojkaškog kluba invalida. Naime, Odbojkaški klub invalida "Zavidovići" i Savez za sport i rekreaciju invalida općine Zavidovići sufinansiraju se sa Tekućeg transfera za fizičku kulturu i sport planiranog u okviru Budžeta općine Zavidovići za 2021.godinu, kao i prethodnih godina.

Tokom prethodne budžetske godine, u skladu sa Kriterijima i Programom utroška sredstava sa Transfera za fizičku kulturu i sport za 2020.godinu, predviđena su sredstva za sportska takmičenja invalida, tačnije gore navedena dva sportska subjekta, u procentualnom iznosu od 5% od ukupnog iznosa planiranog na Transferu za fizičku kulturu i sport.

U ovoj Budžetskoj godini, u skladu sa Programom i Kriterijima raspodjele i korištenja budžetskih sredstava sa Tekućeg transfera za fizičku kulturu i sport za 2021.godinu za sportska takmičenja invalida predviđen je iznos od 10% (4.500,00 KM) od ukupnog iznosa predviđenog Tekućim transferom za fizičku kulturu i sport u Budžetu općine Zavidovići za 2021.godinu, što znači da je došlo do procentualnog uvećanja u odnosu na prethodnu budžetsku godinu za invalidske sportske klubove.

Također su izdvojena dodatna interventna sredstva sa Tekuće budžetske godine u 2021.godini, kao dodatna podrška redovnom radu i aktivnostima Odbojkaškog kluba invalida "Zavidovići" u iznosu od 2.000,00 KM.

Obzirom da je došlo do umanjenja Tekućeg transfera za fizičku kulturu i sport u 2021.godini u skladu sa Budžetom Općine Zavidovići za 2021.godinu nije realno očekivati značajnija izdvajanja za klubove koji se ne sufinansiraju sa zasebnih Transfera u Budžetu općine Zavidovići za 2021.godinu.

2. Vijećnik Adi Mahovac: nisam zadovoljan. Imam dopunsko pitanje. Nisam zadovoljan Bilo je vijećničko pitanje: „Zašto nema prenosa sjednice Općinskog vijeća direktnog emitovanja, obavijesti, snimaka u skladu sa ugovorenim obavezama elektronskih medija angažovanih za pružanje ove usluge. Tu se odgovorilo da je to promijenjeno nekim Ugovorom odjednom. Ja ne znam, pitanje, kada je i zašto promijenjen taj Ugovor i zašto se tolika sredstva izdvajaju za Smart televiziju ako ne može se u to uvrstiti tih 300 maraka koliko košta prenos jedne sjednice. Zašto i kada je promijenjen taj Ugovor i da li će se izmijeniti Ugovor u smislu da bi se građani mogli onaj da bi građani mogli u direktnom prenosu da prate sjednicu Općinskog vijeća. Hvala.

Odgovor na vijećničko pitanje (Odgovor je sačinila Stručna služba općinskog načelnika): Općina Zavidovići i PD „SMART TELEVIZIJA“ d.o.o. Tešanj zaključili su 05.04.2021. godine ugovor o izvršenju usluga za koprodukciju televizijskog programa za potrebe informisanja građana općine Zavidovići o radu organa Općine Zavidovići za 2021. godinu broj: 02-11-185/21-AP-11 od 05.04.2021. godine. Naveni ugovor se nije mijenjao, te za direktan prenos sjednica Općinskog vijeća Zavidovići nije potrebno mijenjati navedeni ugovor jer se direktan prenos sjednica ne može smatrati koprodukcijskim programom. Za direktan prenos sjednica Općinskog vijeća Zavidovići morao bi se zaključiti novi ugovor usluge tzv. Live stream i za nju bi trebalo izdvojiti na mjesečnom nivou oko 300,00 KM bez PDV-a. Trenuto se dodatna sredstva za ovu usluge ne mogu izdvojiti, a da se pri tome ne ugrozi isplata ranije ugovorenih usluga raznih vrsta.

6. VIJEĆNIČKO PITANJE VIJEĆNIKA IGORA ŠIMŠIĆ

Vijećnik Igor Šimšić: ne. Postavio sam znači dva pitanja. Jedno se tiče Oglasnih informativnih mjesta na području općine koje nisam dobio. Samim time ne mogu se ni očitovao jesam li zadovoljan. A drugo se tiče realizacije Inicijative za stambeno zbrinjavanje mladih bračnih parova odprilike nešto slično što je sada kolega Fojnica predložio. I zamolio bi stvarno službe ili već ko piše da nas prestaju prestane vrijeđati ovdje intelegenciju mislim. Zamislite odgovora na pitanje, ovako, moram biti grub, kaže inicijativa je prihvatljiva, ali neprovodiva. Ko vas pita jel prihvatljiva. Prihvatio je organ. Ima svoje rješenje ima sve ostalo i tako dalje. Neku Strategiju mi spominjete ovdje omladinske politike gdje se osiguravaju sredstva za stanove, niđe veze. Ne piše tamo. Sljedeća stvar, skromne budžetske mogućnosti lokalnog nivoa vlasti nisu dovoljne za implementiranje ovakve jedne, imamo veći Budžet i od Općine Maglaj i Žepče koji su izdvojili po 47.500 maraka i realizovale znači sa tim svojim skromnim budžetima. Eto, mi imamo 12 miliona, pa mi nismo skromni. Hvala.

Odgovor na vijećničko pitanje (Odgovor je sačinjen na osnovu akta Službe za upravu društvenih djelatnosti i opću upravu broj: 04-45-14/21-AP-218 od 30.07.2021. godine): Dana 30.7.2021.godine ova Služba je sačinila Odgovor po gore pomenutom Vijećničkom pitanju u kome je odgovoreno sljedeće:

Inicijativa "Podrška stambenom zbrinjavanju mladih bračnih parova na području općine Zavidovići" je prihvatljiva ali neprovodiva obzirom da Budžetom za 2021. godinu nisu planirana sredstva za navedene svrhe.

Općinsko vijeće Zavidovići je Odlukom, broj:01-05-4024/18-AP-10 od 30.05.2018. godine, usvojilo Strategiju omladinske politike općine Zavidovići za period 2018.-2023.godine.

Poglavlje "Socijalna zaštita i standard mladih" navedene Strategije na strani 55. Pod strateškim ciljem 3. predviđa sljedeće:

"Osigurati sredstva za stambeno zbrinjavanje mladih putem dugoročnih kredita sa povoljnim uslovima, a na osnovu kadrovskog i pronatalnog modela."

U ovoj godini bi bilo moguće realizovati inicijativu ukoliko se izvrši Rebalans Budžeta sa uvođenjem Transfera za pomoć mladim bračnim parovima u stambenom zbrinjavanju.

U vezi vašeg pitanja vezano za izostanak po realizaciji ovog Zaključka Općinskog vijeća Zavidovići vezano za stambeno zbrinjavanje mladih i zapošljavanjem mladih, obaviještavamo Vas da Budžetom Općine Zavidovići za 2021.godinu nisu planirana sredstva sa zasebnog transfera za pomoć mladima u stambenom zbrinjavanju, obzirom da postoji regulisana mjera subvencioniranja plaćanja dijela kamatne stope za mlade koji prvi puta rješavaju stambeno pitanje sa viših nivoa vlasti što je vidljivo iz ponude stambenih kredita za mlade Union Banke čiji je većinski vlasnik Vlada Federacije BiH.

Skromne Budžetske mogućnosti lokalnog nivoa vlasti nisu dovoljne za implementiranje ovakve jedne.

S poštovanjem

Dostavljeno:

1. Naslovu,
2. U spis.

OPĆINSKI NAČELNIK

Dr. sci. Hašim Mujanović

Obradio: _____
(Nermin Čahtarević)